

SUHA SO MIENDO

IBRANI

Kaatono Wamba

Suha so miendo Ibrani, ta'ampamo ha'oleo ini miina bhe mande'aanea bhaha'i nomai'ao ne la'ae, hampano neano miina nabuhie weo suhano. Ampamo kaowu, mie buhie seemie neangkando miendo sarani, bhe nopande'aane sepali'a i'ino kitabi nekonando Podhandi'a Ngkodau. Nentalea dua anoa miina natilentu ne rasulu ompulu hoduano (2:3).

Suha aini dopakatue ne tombudo umati miendo Ibrani (nopototo bhe miendo Yahudi bhe miendo Israel), ne amai liwundo miina dua nati-pande'aoa. Ampamo kaowu, dopande'aaneomu mie tumahimano suha aini miendo sarani nefodee-dee hampano kaparasaeando. Siga'a dofekandidikida bhe dorampasi arataando (10:32-34), nandoo dua titohongku'ano (13:3). Hampano sabhaha kasabha bhe kaseke na'a, nandoo mie marasaeano ini nondidiki lalondo, sampe dahumunsamo kaparasaeando. Wohano noma'omo dakumukundo Ompu Yesus bhe dasumuli ne agama Yahudi.

Nandoo tolu honda netalesaono buhino suha aini. Kabhao-bhaono, Yesus kotu-kotu'u Anano Lahata'ala. Anoa ini nofoliuda ana-anabii ne dhamani wawono, nofoliu'e dua anabii Musa bhe sabhaha mala'ekati (1:1 - 4:13).

Kahaa iseno, Yesus Imamu Bhalano suhue dhamani, nofoliuda kosa-sawi'ae imamundo miendo Yahudi. Kapopanga nefoampeno Imamu Bhalano ini, o kapopanga sumangka, ma'anano mbadhano Wutono, nofoliu'e kosasawi'ae kapopanga nefoampendo imamu sigao'ano bhe nolaku ampa suhue dhamani. Pedamo ana'a Yesus nembali poato'aono podhandi'a bu'ou (4:14 - 10:18).

Katolu iseno, peda Imamu Bhalano Yesus neowa kasalamati sakotu'uno so manusia. Ane doparasaea ne Yesus, dobasimo mai'ao ne sabhaha dhosa, kate'i tawa kamihino lalo ne mate. Notilengkamo dua kaangka'a dopesua ampa ne wiseno Lahata'ala weo sambahea, sampe nembali dofekakado wutondo doma'oti Lahata'ala (4:16; 6:20; 10:19-23).

Lima paku buhino suha aini notangahida keana dohunsu kaparasaeando (2:1-4; 3:7-19; 5:11 - 6:12; 10:26-39; 12:18-29). Wambano feadho nogili, hampano nofe'ulaianda kahukumu so ne'awando mie kumukundo-no Lahata'ala dumadino.

So notisangke'ao lalondo, netula-tulaanda sandahano sabhaha mie marasaeano endefi'ini (psl 11). Pasala aini notiende-ende bhe notimoasi'ao sepali'a hampano nofekamatangka kaparasaeantoomu ta'ampamo aitu.

Lahata'ala nokobhoasao noangka ne Anano

1:1-3

1 Ne dhamani wawono Lahata'ala nofendu-fendua'e noko-bhoasao ne awua'ntoomu noangka ne ana-anabii nepake sabhaha dhala. ²Ne pandano dhamani ini Lahata'ala nokobhoasao ne intaodiomu noangkamo ne Anano. Anoamo toka nefotantuno mbali kohaku'aono bhahi-bhahi'ae ndumandoo'ano. Noangkamo dua ne Anano ini, Lahata'ala nofokonandoo alamu bhalano. ³Anoa nofotiwoha tilangano kakalabhiano Lahata'ala, katuno bhe sifati-no pasae wutono Lahata'ala. Anoamo dua tumukono alamu bhalano ini nopake bhoasaono foliuno kuasa. Nopalusi nofekangkilo manusia mai'ao ne dhosando, Anoa nengkohamo ne suanano Lahata'ala fofoliuno kakalabhia te wawono wawo.^a

Anano Lahata'ala nofoliuda mala'ekati

1:4-14

⁴Anano Lahata'ala ne'awa kaengkoha'a te wawono kaengkoha'ando mala'ekati, pedamo dua o nea netahimano ne Lahata'ala nofoliu dua katifosibhalano bhe neando mala'ekati. ⁵Kapa'amo Lahata'ala miina sepali'a nakobhoasao bhe nasepaku ne seemie mala'ekati,

“Hintumo itu Anaku,
akoana'angkomo oleo itu.”^b

Miina dua nakobhoasao ne mala'ekati sigao'ano,

“Idi aembali so amano,
anoa naembali so anaku.”^c

⁶Wakutuuno nofopesua Anano titiisa we dhunia ini, nokobhoasao toha ambano,

“Kosasawindo mala'ekatiku tetewei datumaohao
sombado ne Anoa.”^d

^a 1:3 Mzm 110:1

^b 1:5 Mzm 2:7

^c 1:5 2Sam 7:14; 1Taw 17:13

^d 1:6 Ul 32:43; Mzm 97:7

- ⁷Lahata'ala nokobhoasao nopulao'ao mala'ekati peda aini,
 “O mala'ekati nohabudamo dembali kawea mo'osa,
 palima-lima umondofaane dembalimo hendeno
 efi.”^a
- ⁸Tamaka ne Anano maitu, Lahata'ala nokobhoasao ambano,
 “Hintu Lahata'ala, kafopahinta'amu nadumaa-daa'e
 suhue dhamani,
 no'adhili mpuu kuasamu.
- ⁹ Moasiane kabanara, bansie podiu modai.
 Kanandoo'anomo o Idi, Lahata'alamu, aminakikomo
 mbali tandano apiliko,
 awa'angko kawulano lalo maka liudamo
 sabhangka'imu.”^b
- ¹⁰Ambano toha,
 “Hintu Ompu, kabhao-bhaono mefongkohano sandino
 dhunia,
 o lani angka'ano limamu.
- ¹¹Bhahi-bhahi'ae maitu nabinasa,
 tamaka hintu sadaa-daako,
 bhahi-bhahi'ae naonggasi nada pakea.
- ¹²Alamu bhalano ini lumupie nada bhadhu,
 nada pakea bhoosiane sigao'ano;
 tamaka hintu pae natibhaliia,
 dadimu pae bhe kapulia.”^c
- ¹³Lahata'ala ingka miina sepali'a nakobhoasao ne seemie mala'ekati
 peda aini,
 “Mengkohamo ne suanaku ini,
 ampa kosasawindo kaewamu ahumabuda so
 kafinda'amu.”^d
- ¹⁴Ingka o mala'ekati maitu saneamo rohi meompuno ne Laha-
 ta'ala, andoamo dua netuduno Lahata'ala da'umondofao manusia
 so metahimano kasalamati.

^a 1:7 Mzm 104:4

^b 1:8-9 Mzm 45:6-7

^c 1:10-12 Mzm 102:25-27

^d 1:13 Mzm 110:1

Kasalamati bhalano

2:1-4

2 Dadi'anomo intaodiomu tabeano sedhulu'a damintahakie kafoina'u toka nefetingkentoomu, bhahasaa nowowo'o kaita solo. ²O bhoasao nefosampendo mala'ekati ne awua'intoomu, nandoo nokotu'u sampe mie kumangkala'ie bhe tapa meangkano de'awamo kahukumu mantasi'ano. ³Ane pedamo ana'a endefi'ini, bhemo toha ha'oleo ini. Nada amai dalumapa ne kahukumu gaha'a ane pae dapokiha'iao kasalamati bhalano maitu? Kapa'amo kasalamati amaitu kabhao-bhaono nofolelee wutono Ompu, maka mie metingkee padamo dosakusiiiane kakotu'uno ne intaodiomu. ⁴We simbalino dua ana'a, Lahata'ala nofekamatangka kasakusiindo nepake tanda tapa mentela, giu timente'aono bhe sabhaha kuasa mangaliuno, bhe nofodawu-dawu'ao dua kawa'aono Rohino Lahata'ala nopoangkafi bhe kapoindalono Wutono.

Yesus nopobhahitie bhe manusia

2:5-18

⁵Ingka suano mala'ekati me'awano kuasa mai'ao ne Lahata'ala so mahintano dhunia bu'ou so humatono itu, nesambi-sambili-ntoomu ini. ⁶Tamaka nandoo mie pugauno, notibuhi weo aeatino Kitabi peda aini,

“O ae bhahaa manusia sampe fe'u-fe'ulaiane?
La'ae gaha'a anano manusia maitu sampe
ondofaane?

⁷ Sekabantaha fosampue seendai we pandado
mala'ekati,
padamo dua wa'ane kaengkoha'a kumalabhia bhe
tifosibhala peda omputo.

⁸ Bhahi-bhahi'ae ne alamu ini fokuasaane,
padamo folongkoda ne wawono a'eno.”^a

Ane peda ana'a, nokoma'ana bhahi-bhahi'ae nofokuasaandae Lahata'ala ne manusia, miina bhe tapa nekuasaindo. Tamaka ampa aitu miina'o daohaomu manusia kumuasaino bhahi-bhahi'ae ini. ⁹Ampamo kaowu dowohamoomu Yesus. Sekabantaha nofosampue Lahata'ala seendai we pandado mala'ekati, neanomo hampano rahamatino Lahata'ala nenamisimo mate so kosasawindo manusia.

^a 2:6-8 Mzm 8:4-6

Ampa itu dow'aane kaengkoha'a kumalabhiano bhe tifosibhala peda omputo, hampano padamo nokadee-dee sampe mate.

¹⁰Ingka nopantasimo so Lahata'ala, Anoamo mokonandoono bhahi-bhahi'ae somo dua Wutono, nohabu Yesus mbali melengkanokaangka'ano kasalamati'a, nofosangkaane kakadee-dee. Pedamo ana'a noangka ne Yesus dobhahi manusia nebhasino Lahata'ala daeala dawu weo kakalabhiano. ¹¹Anoa mefekangkilonono manusia mai'ao ne dhosa bhe manusia nefekangkilo, saneamo doseama. Kanandoo'anomo Yesus miina naoambanoa nokonada bhahitieno.

¹²Ambano [Yesus ne Lahata'ala,]

“Amolele bhihitano neamu ne bhahitie'iku,
aelagu amudhiko weo hompu'ando umati.”^a

¹³Ambano dua,

“Tetewei aposahuna'ao mpuu ne Lahata'ala.”

Ambano dua,

“Aini'a kanaumo bhe kosasawindo ana'i kawa'aono
Lahata'ala ne Idi.”^b

¹⁴Ana'i nepulao'aono maitu saneamo manusia kombadha kasarano, maka Yesus nopototo'ao wutono bhe andoa, nodadi peda seemie manusia. Kahabu'ano peda ana'a, neanomo noangka ne mateno, Yesus nofobinasamo mintahano kuasano mate, o Kafeompu'ano seetani. ¹⁵Patudhunomo dua so namobebasi'ao manusia dumadino peda bhatua sasukae umuhundo, nofobhatuada kate'i ne mate. ¹⁶Ingka nentaleamo suano mala'ekati netulumino tamaka manusia sampu'ano Abraham. ¹⁷Kanandoo'anomo Yesus nofaraluu nopototoane [Lahata'ala] bhe bhahitie'ino ne ae maka dua, kaembali'anomo Imamu Bhalano tiposahuna'aono, mobhelano lalo ne mie bhaino bhe meompuno ne Lahata'ala. Pedamo dua ana'a neowa kapometaa'ando manusia bhe Lahata'ala mosalinomo dhosando umatino manusia. ¹⁸Hampano wutono Yesus padamo nokadee-dee weo sabhaha kasoba ne'awano, maka Anoa nembali netulumi mie me'awano kasoba.

Nobhala Yesus bhe anabii Musa

3:1-6

3 Dadi'anomo bhahitie'iku mongkilono toka nebhasino Lahata'ala so menamisino surugaa! Fekihikaaitaomu nehabuno

^a 2:12 Mzm 22:22

^b 2:13 Yes 8:17-18

Yesus, Rasulu bhe Imamu Bhalano neparasaeantoomu. ²Anoa notuhu mpuu lalono ne Lahata'ala toka sumangkee, pedamo dua endefi'ini anabii Musa notuhu mpuu lalono nodhalangi takano weo polambuno Lahata'ala.^a ³Ampamo kaowu nopantasi mpuu Yesus ne'awamo kafosibhala noliu'e kafosibhala ne anabii Musa, tapedamo seemie pandeno lambu noliu'e katifosibhalano bhe lambu nehabuno. ⁴Daanumo se'o-se'onu lambu dofoehee pande, tamaka moeheno bhahi-bhahi'ae ndumandoono ingka wutono Lahata'ala. ⁵Anabii Musa daanumo notuhu lalono peda seemie palima-lima weo polambuno Lahata'ala, pugauno bhe kahadhaano nofosusu'ao so nekobhoasa'aono Ompu mada kaowu. ⁶Tamaka Kristus notuhu lalono peda Anano Lahata'ala mande'aono polambuno Amano. Polambuno Lahata'ala ingka intaodiomu ini, sumanomo sadaa-daa pae dakamihi-mihia bhe damintahaki mpuu kaposahuna'ao bhe so ne'awantoomu, kaowose'anomo bhakentoomu.

Kabinasa mba'inomo dohunsa kaparasaea

3:7-19

⁷Dadi'anomo ambano Rohino Lahata'ala,

“Ane oleo itu fetingkeomu suahano Lahata'ala,

⁸ koise mekatu'a pongkeomu peda awua'imiu,

wakutuuno doewangi bhe dosolo-solo Lahata'ala we
pandaso bhalano.

⁹ [Ambano Lahata'ala,] ne na'a awua'imiu dosolo-solo

bhe do'udhi kanau,

mahinggamo dowohae nehabuku kaomponano fato
fulu ta'u.

¹⁰ Ainimo ka'amaha'aku ne mie dhamani ana'a, ambaku,

‘Totonu lalondo sadhia nokolilino,

dongahe damangkafi pahintaku.

¹¹ Dadi'anomo atundada weo amahaku,

Andoa paise sepali'a damesua we liwu kafewule'a

nefontaa-ntaaku.’ ”^b

¹²Bhahitie'iku! Posi'ondoomu, koise bhe kolalo modaino bhe tapa marasaeano ne olotamiu itu, sampe nokukundo Lahata'ala dumadino. ¹³Tamaka naetaa se'o-se'oleo pofeka-fekatangkaomu lalo tinangke dadiomu ne dhamani nekonando “Oleo Itu” weo

^a 3:2 Bil 12:7

^b 3:7-11 Mzm 95:7-11

Kitabi, keana bhe mekatu'a pongkeno ne olotamiu itu sampe nabhohe-bhohe'ie dhosa. ¹⁴Kapa'amo intaodiomu ini dembalimo posabhangka'ano Kristus, sumanomo ampa kapuliaono namatangka fintahantoomu ne kaparasaea mpini kabhao-bhaono. ¹⁵Weo Kitabi notibuhi peda aini,

“Ane oleo itu fetingkeomu suahano Lahata'ala,
koise mekatu'a pongkeomu peda awua'imiu
wakutuuno doewangi Lahata'ala.”^a

¹⁶La'ae bhahaa metingkeno suahano Lahata'ala maka doewangie? Ingka andoa maitu saneamo mie neatono anabii Musa dolimba mai'ao we witeno Mesir. ¹⁷Kaowu ne la'ae bhahaa Lahata'ala no'amaha kaomponano fato fulu ta'u? Ingka ne andoa mehabuno dhosa bhe mate kambaha-mbahano we pandaso bhalano. ¹⁸La'ae bhahaa netundano Lahata'ala putae paise sepali'a damesua we liwu kafewule'a nefontaa-ntaano? Ingka andoa pata meangkano.^b ¹⁹Dadi'anomo dolosangiemoomu putae pata kapesua'ando hampamo miina damarasaea'a.

Kafewule'a nefontaa-ntaano Lahata'ala 4:1-13

4 Dhandino Lahata'ala damesuakiomu kafewule'ano ingka sadaa-daa'e. Dadi'anomo naetaa posi'ondoomu mpuu, keana nonandoo ne olotamiu itu so tapa humatono. ²Kapa'amo Bhihita Metaa ingka padamo dofolelee ne intaodiomu pedamo dua ne andoa. Ampamo kaowu Bhihita Metaa miina nakofahalaa'a so andoa hampamo dofetingkee tamaka miina dapoangkafiane bhe kaparasaea. ³Mpahinomo intaodiomu marasaeano so mesuakino kafewule'a nedhandi'aono na'a. Aini noposahataa bhe bhoasaono Lahata'ala peda ini,

“Atundada weo amahaku,
Andoa paise sepali'a damesua we liwu kafewule'a
nefontaa-ntaaku.”^c

Lahata'ala nokobhoasao peda maitu mahingamo kahadhaano ingka notokamo mpini pakatifokonandoono dhunia. ⁴Kapa'amo aeati weo Kitabi nopulao'ao oleo ne kafitu oleono peda aini, “Ne

^a 3:15 Mzm 95:7-8

^b 3:16-18 Bil 14:1-35

^c 4:3 Mzm 95:11

kafitu oleono Lahata'ala nofewulemo ne sabhaha kahadhaano.”^a

⁵ Pokai'ano bhe ana'a nandoo dua tibuhino peda aini, “Andoa paise sepali'a damesua we liwu kafewule'aku.”^b ⁶ Aini nokoma'ana, mie kabhao-bhaono metingkeno Bhihita Metaa miina damesua we liwu kafewule'a na'a hampano miina daeangkaa. Ane peda ana'a ingka nentaleamo dua putae nandoo mie sigao'ano so mesua'ano we kafewule'a na'a. ⁷ Kanandoo'ano Lahata'ala padamo nefotantu toha se'oleo nokonae “Oleo itu”, peda nekobhoasa'aono palusi ntini ta'u-ta'u noangka ne Daud. Bhoasaono peda sa'ituini,

“Ane oleo itu fetingkeomu suahano Lahata'ala,
koise mekatu'a pongkeomu.”^c

⁸ Ane ibahano Yosua kotu-kotu'u nama'anda kafewule'a nedhandi'aono Lahata'ala na'a, ingka tantumo mada ana'a Lahata'ala paemo naesambi-sambilia oleo sigao'ano.^d ⁹ Dadi'anomo so umatino Lahata'ala, sadaa-daa'e nokantaa-ntaa oleo kafewule'a, peda kafewule'ano Lahata'ala ne oleo kafitu oleono. ¹⁰ Kapa'amo mie mesua'ano we kafewule'a na'a, namewule ne sabhaha kahadhaano, pedamo wutono Lahata'ala nofewule ne kahadhaano. ¹¹ Dadi'anomo, ulei kaitaomu lalontoomu so damesua'ao we kafewule'a nedhandi'aono Lahata'ala na'a, keana bhe binasano hampano doangkafi sandahando mie pata meangkano endefi'ini.

¹² Bhoasaono Lahata'ala nodadi bhe nolaku, nohoko anoa bhe kampue komata haa weta'ano. Bhoasaono Lahata'ala nofotobho ampa nopoleka'ao alusu bhe rohi, nopogaati'ao losua bhe lolino buku, nopooli nopofelesaane sabhaha fekihi bhe dukuno lalondo manusia. ¹³ Miina bhe dumadino notifebuni ne matano Lahata'ala, bhahi-bhahi'ae kanggetu delembi bhe notiwolengkasi ne wiseno. Ne Anoamo dua dapowise'ao wutontoomu ne sabhaha nehabunto.

Yesus Imamu Bhalano

4:14-5:10

¹⁴ Kanandoo'anomo tetewei damintahakie'omu mpuu kapara-saea ne'akuintoomu, kapa'amo bhe imamuntoomu, Imamu Bhalano kumalabhiano toka mangkano surugaa ampa te wiseno Lahata'ala. Anoamo itu ingka Yesus, Anano Lahata'ala. ¹⁵ Imamuntoomu, o

^a 4:4 Kej 2:2

^b 4:5 Mzm 95:11

^c 4:7 Mzm 95:7-8

^d 4:8 Ul 31:7; Yos 22:4

Imamu Bhalano numamisino dua sabhaha kanalentoomu. Anoa nopototo bhe intaodiomu ini, padamo nonamisie sabhaha kasoba, ampamo kaowu miina nakodhosaa. ¹⁶Dadi'anomo [weo sambahea-ntoomu] fekakado kaitaomu dama'otiomu kaengkoha'ano Lahata'ala kumalabhiano fowa'aono rahamati, neanomo dae'awa rahamati bhe daetahima kabarakati sampe natumulumi kaita ne wakutuuno dofaraluu'e.

5 Seemie Imamu Bhalano sadhia dopilie mai'ao ne manusia, maka dosangkee so meompuno ne Lahata'ala nowakili'ao manusia bhaino. O takano nefoampe kawa'ao bhe kapopanga nesumbele ne Lahata'ala so kati'amponi'ano dhosa. ²Seemie Imamu Bhalano nembali nomalu-malusi mie tapa konipande'aono bhe kolilinono fekihi, kapa'amo wutono nonale dua peda mie bhaindo. ³Kanandoo'anomo tetewei nafoampe kapopanga ne Lahata'ala so kati'amponi'ano dhosa, suano kaowu dhosando umati bhahino tamaka dhosano wutono dua. ⁴Miina bhe sumangkeno wutono so taka tifosibhalano ini [dembali Imamu Bhalano], tamaka kaembali'ando Imamu Bhalano ingka nobhasida Lahata'ala, peda Harun endefi'ini.^a

⁵Pedamo dua Kristus miina namekakalabhia Wutono nembali Imamu Bhalano, tamaka Lahata'ala kobhoasaono ne Anoa,

“Hintumo itu Anaku,
akoana'angkomo oleo itu.”^b

⁶Bhoasaono dua Lahata'ala ne aeati sigao'ano peda aini,

“Hintumo Imamu ampa suhue dhamani,
peda Imamu Melkisedek.”^c

⁷Weo dadino peda seemie manusia, Yesus padamo nefoampe sambahea bhe kamesalo ne Lahata'ala poowa nokei nopontuhufi bhe luuno, ingka Lahata'ala kokuasano mosalamatie mai'ao ne mate. Hampano kalebeno dadino, Lahata'ala nofetingkee.^d ⁸Mahinggamo Anoa Anano Lahata'ala, nopoguhu nembali mie meangka weo kakadee-dee nenamisino. ⁹Nosangka kaowu dadino, Yesus nembalimo meowano kasalamatie suhue dhamani so kosasawindo mie meangkano ne Anoa. ¹⁰Anoa nosangkee Lahata'ala nembali Imamu Bhalano, peda Imamu Melkisedek.

^a 5:4 Kel 28:1

^b 5:5 Mzm 2:7

^c 5:6 Mzm 110:4

^d 5:7 Mat 26:36-46

Kafodhaga keana dokukundo kaparasaea

5:11-6:8

¹¹ Sakotu'uno nandoo nobhahi so nepugau'ao mani pokai'ano bhe nesambili mani sa'ituini, tamaka ingka nomahasai tatumalesaane, hampano kaluntuno melosangiomu. ¹² Sakotu'uno ingka temponomo membaliomu guru, tamaka ko'ula'ano ingka nandoo nofaraluu damoina'uangkoomu kafetompuna'ino dopoguhu'ao bhoasaono Lahata'ala. Hintimiu tabeano mohou'omu kaowu oeno titi, pae'o mepooliomu oti motu'a. ¹³ Kapa'amo la'ae mefaraluuno oeno titi miina'o naelosangi kafoina'uno habu metaa bhe habu modai, ingka nandoo noana'i mohobu. ¹⁴ Tamaka oti motu'a so mie motangkano dadi, andoa dokaneamo wutondo dopake matando, tingalando bhe siitondo, sampe nembalimo dopofelesaane metaa'ano bhe modai'ano.

6 Dadi'anomo dohunsae'anaomu kadeki kafoina'u kabhao-bhaono pokai'ano bhe Kristus, maka damopansuhue'omu dapoguhu'ao so dadi motangka peda mie marasaeano. Koemo tadofendu-fendua'omu kafoina'u kabhao-bhaono, putae manusia tetewei nametompa'ao podiu meowano mate, maka damarasaea ne Lahata'ala. ² Pedamo dua itu kafoina'uno kakadiu sarani, kafoina'u detei limando te wawondo mie bhaindo desaloanda kabarakati, kawanu'ando mie mate bhe kahukumu suhue dhamani. ³ Dadi'anomo ane Lahata'ala namolalesa kaita, ingka ana'aemo so nehabuntoomu, damopansuhuomu kapoguhuntoomu.

⁴ Kapa'amo ane bhe mie kumukundono Lahata'ala, miinamo bhe dhalano dasumuli dametompa'ao dhosando. Endefi'ini padamo notilada tilangano Lahata'ala, denamisimo kadawuno surugaa bhe padamo dua dotahima Rohino Lahata'ala peda bhaindo. ⁵ Padamo dua dofenami kataano bhoasaono Lahata'ala, bhe denamisimo kuasa mai'ao ne dhunia mbuhumai. ⁶ Tamaka gaha'a pada ana'a andoa dokukundoemo Lahata'ala. Ane peda ana'a ingka pae bhe kapooli sumuli damowada dametompa'ao dhosando. Kapa'amo andoa kao-kaomo suli dokantai Anano Lahata'ala te sau salipu bhe dofeka'aebue ne wisendo mie bhahi.

⁷ Kapa'amo ane o wite nentuhu nesoso use maka nokohasili'ao sabhaha kantisa kofahalaano mbali manusia kumahadhaa'e, ingka wite ana'a ne'awamo kabarakatino Lahata'ala. ⁸ Tamaka ane o wite notumbui'e kahoku kokihi bhe laiwongka maka wite aitu miina

nakofahalaa'a, mada kaowu nabhatata'ianemo Lahata'ala maka panda-pandano dakumonsulapai'e.

Damekatangka fintaha ne kaposahuna'aonto

6:9-20

⁹Bhahitie'iku timoasi'aono! Mahinggamo tapugau peda na'a, insaodi taparasaea mpuu padamo metahimaomu sabhaha metaa'ano noliu'e [wite sa'ituini], Nepulao'aoku kabarakati pokai'ano bhe kasalamati'amiu. ¹⁰Lahata'ala suano Lahata'ala tapa umadhilinoa. Ingka pae naolimpu'aanea sabhaha kahadhaa bhe kanini kaasimiu ne Anoa nefotiwohamiu wakutuuno ondofao'omu umati marasaeano endefi'ini ta'ampamo aitu. ¹¹Gao mani mpuu hintimiu seemie-seemie motiwohaomu kansuhu kakampuu-mpuuno lalomi ampa we kapuliaono, sampe neanta-antagimiu kotu-kotu'u nako'ulamo. ¹²Takiido membaliomu mie mantawa, tamaka gao mani mangkafiomu sandahano mie tumahimano nedhandi'aono Lahata'ala hampano kaparasaea bhe kakosabahando. ¹³Kapa'amo wakutuuno Lahata'ala nopodhandi bhe Abraham, nofemata tete-wei nadhumalangie. Nofemata nosambili Wutono, hampano ingka miina bhe lumiuno Lahata'ala. ¹⁴Ambano, "Kotu-kotu'u abarakatiko, bhe ama'angko sampu'a bhahi."^a ¹⁵Abraham nokosabaha neanta-antagi ampa no'awamo nedhandi'aono Lahata'ala na'a.

¹⁶Ane manusia dofemata ingka dosambili moliuno kuasa bhe wutondo, maka femata maitu mbalimo kafekamatangkano pugau, kasongkonomo potaga-tagali'a. ¹⁷Lahata'ala nopoindalo nofotiwoha kakampuu-mpuuno lalono ne manusia tumahimano dhandino, putae patudhuno maitu paise nabhalii'ea, dadi'anomo dhandino na'a nofekamatangkaane femata. ¹⁸Haa hondano ini paise nati-bhaliia, kapa'amo Lahata'ala pae bhe kapoolia nagumau-gau podhandino bhe fematano na'a. Kanandoo'anomo intaodiomu meoluno ne Lahata'ala dae'awa katangkano lalo so damintahaki'ao kaposahuna'ao kumantaa-ntaano te wisentoomu. ¹⁹Kaposahuna'aontoomu maitu tapedamo matano kai [labuno kapala], nembali kafintaha'a motangka bhe tumohopono so alusuntoomu. Kaposahuna'ao maitu nohato ampa we sembalino kai bhalano kahondomino Boloku Foliuno Kangkilo [we Lambuno Lahata'ala te surugaa,^b ²⁰Yesus

^a 6:14 Kej 22:16-17

^b 6:19 Kel 26:31-35; Im 16:2. Kai bhalanomo aini pobhensino nopobutu bhe mateno Yesus te sau salipu, Mat 27:51

nopa'indulumo nopesua te na'a nofomelengka'ao kaangka'a, nembalimo Imamu Bhalano ampa suhue dhamani peda imamu Melkisedek.

Pototo'ano Kristus bhe Melkisedek

7:1-10

7 Melkisedek ini omputo ne kotano Salem, nembali dua imamu no Lahata'ala Foliuno kalangke. Wakutuuno Abraham nosuli mai'ao ne popahisa'a bhe notalo omputo lidimano mai'aono te mata oleo, nosumpui'e Melkisedek. Pada ana'a Melkisedek no barakatimo Abraham. ² Abraham nodawu kafotalo'ano nofeompulu dawue maka sedawu nowa'ane Melkisedek. Doangkafi neano, Melkisedek kabhao-bhaono nokoma'ana "Omputono kabanara", maka anoa dua omputo we Salem, ma'anano "Omputono katohopo".^a ³ Mulao'ano Melkisedek ini, miina bhe tibuhi'ano la'ae inano bhe amano tawa siwuluno, miina natipande'ao dua kalente'ano tawa kamate'ano. Dadi'anomo tapedamo dua Anano Lahata'ala, anoa nembalimo imamu ampa suhue dhamani.

⁴ Tandai'eomu kabhalano mie aini, sampe amano bansano liwuntoomu Abraham nowa'ane seompulu dawu'a mai'ao ne bara karampasi'ano ne popahisa'a. ⁵ Weo tubhono agama Yahudi, sampu'ano Lewi membalino imamu tetewei detahima seompulu dawu'a mai'ao ne sabhaha hasilindo umatino Israel, gaha'aitumo umatino Israel ingka sanea bhahitiendo, sampu'ano dua Abraham.^b ⁶ Melkisedek suano sampu'ano Lewi, gaha'a netahima dua seompulu dawu'a mai'ao ne sabhaha nepoolino Abraham. Anoa nobarakati dua Abraham, gaha'aitumo Abraham maitu ingka tumahimanomo dhandino Lahata'ala. ⁷ Daanumo pae bhe so tumaganoa putae mie ne barakati nofepanda bhe mie fobarakatino. ⁸ Imamu metahimano seompulu dawu'a mai'ao ne umatino Israel maitu, ingka sanea manusia momateno, tamaka notibuhi weo Kitabi, putae Melkisedek, mie metahimano seompulu dawu'a mai'ao ne Abraham maitu, sadaa-daa'e nodadi. ⁹ Dadi'anomo naembali dakumonae, Lewi bhe sampu'ano metahimano seompulu dawu'a ne umatino Israel, ingka dotanduo dua seompulu dawu'a ne Melkisedek, noangka ne Abraham. ¹⁰ Daanumo waktuu ana'a Lewi miina'o

^a 7:1-2 Kej 14:17-24

^b 7:5 Bil 18:21-24

nalumentea, tamaka wakutuuno Melkisedek nosumpui Abraham, Lewi neatemo weo mbadhano Abraham, awuano.

Nofewawo Kristus bhe Imamu Bhalano sigao'ano

7:11-28

¹¹Tubhono agama Yahudi ingka dofosampee ne miendo Israel nengkoaha ne ka'imamu'ano Lewi. Ane ibahano takano imamu na'a neowamo dadi sumangka, noafa bhahaa nofaraluu'ao desangke dua seemie imamu sigao'ano, imamu peda Melkisedek, suano mai'ao ne sampu'ano imamu Harun? ¹²Kapa'amo ane kaengkoaha'ando ka'imamu'a dobhali'e, tantumo dobhali'emo dua tubhono agama Yahudi. ¹³Nepulao'ao ne ini ingka Ompuntoomu. Anoa nomai'ao ne sampu'a sigao'ano [suano sampu'ano Lewi]. Sampu'ano na'a bhe naseemie miina'o bhe membalino imamu mefoampeno kapopanga. ¹⁴Kosasawindo mie dopande'aane putae Ompuntoomu nomai'ao ne sampu'ano Yehuda, maka anabii Musa miina sepali'a nasumabili sampu'ano Yehuda so membalino imamu.

¹⁵Aini sedhulu'amo dua kantaleano bhe hato'ano seemie imamu peda Melkisedek. ¹⁶Anoa dosangkee mbali imamu miina naengkoaha ne atorano sampu'ano manusia, tamaka katisangke'ano nengkoaha ne kuasano dadi tapa kotompano. ¹⁷Kapa'amo [weo Kitabi] dokowambaane peda aini,

“Hintumo imamu ampa suhue dhamani,
peda imamu Melkisedek.”^a

¹⁸Dadi'anomo atora ngkodau dofogampiemu, hampano miina naotangkaa bhe miina dua nakofahalaa'a. ¹⁹Tubhono agama Yahudi na'a miina naeowa dadi sumangka ne la'ae maka dua, kanandoo'anomo dowaa'ala kaita posahuna'ao sedhulu'ano kataa. Hampano posahuna'ao ana'a nembalimo doma'otiomu Lahata'ala.

²⁰Pakade bhahi-bhahi'ae ini noangkafiane fematano Lahata'ala, nopo'ala bhe desangke imamu sigao'ano, ingka miina bhe fematanoa. ²¹Tamaka Yesus dosangkee mbali imamu bhe fematano Lahata'ala. Wakutuu aitu Lahata'ala nokobhoasao ne Anoa,

“Ompu nofemata maka pae natibhaliia patudhuno,
Hintumo imamu ampa suhue dhamani.”^b

^a 7:17 Mzm 110:4

^b 7:21 Mzm 110:4

²²Hampano femata ana'a, Yesus nembalimo kafekamatangkano podhandi'ano [Lahata'ala bhe manusia] sedhulu'ano kataa [bhe tetewei nako'ula].

²³Imamu sigao'ano na'a dobhahi sepali'a hampano andoa no'ontoda mate sampe miina daembali kansuhu imamu. ²⁴Tamaka Yesus nodadi suhue dhamani sampe ka'imamu'ano miina nasipulia ne mie sigao'ano. ²⁵Dadi'anomo Yesus nopooli nofosangka mpuu kasalamatindo manusia maino ne Lahata'ala doangka ne Anoa. Kapa'amo Anoa nodadi suhue dhamani mbalimo fosambahea'aono ne Lahata'ala.

²⁶Imamu Bhalano pedandomo ana'a nefaraluuntoomu: Anoa mie mongkilo, miina nakodhosaa, miina nakodengo-dengoa, nopogaati bhe mie kodhosa, dosangkee te surugaa te wawono wawo.

²⁷Anoa nopo'ala bhe Imamu Bhalano sigao'ano, andoa defoampe kapopanga se'o-se'oleo, tabeano mbali dhosando wutondo kadeki maka mbali dhosando umati bhahino.^a Tamaka Yesus nefoampe kapopanga sepaku kaowu ampa suhue dhamani, wakuuuno nofoampe Wutono mbali kapopanga. ²⁸Tubhono agama Yahudi nesangke mie monale dembali Imamu Bhalano. Tamaka nopalusi tubhono agama amaitu, Lahata'ala nehabu dhandi bhe nofemata nosangke Anano mbali Imamu Bhalano, nefosangka ampa suhue dhamani.

Yesus Imamu Bhalano Podhandi'a Bu'ou

8:1-13

8 Puuno bhahi-bhahi'ae nepuga-pugau'aontoomu ini: intaadioimu bhe Imamuntoomu Bhalano medano ana'a, mengkohano ne suanano kaengkoha'ano Lahata'ala fofoliuno kakalabhia te surugaa. ²Anoa nofodhala takano mbali Imamu Bhalano weo Boloku Mongkilo, weo tenda kaeate'ano Lahata'ala sakotu'uno, kafoeheno wutono Ompu, suano kafoehendo manusia. ³Seemie-seemie Imamu Bhalano dosangkee so naefoampe'ao kawa'ao bhe kapopanga nesumbele ne Lahata'ala. Pedamo dua aitu Imamuntoomu nofaraluu dua bhe nefoampeno. ⁴Ane ibahano naeate we dhunia ini, ingka pae naembalia imamu hampano dobhahimo imamu mefoampeno kapopanga doangkafi tubhono agama Yahudi. ⁵Kahadhaando dembali imamu maitu sakotu'uno mbali kaowu sandaha bhe ka'ibahati ndumandoo'ano te surugaa. Aini

^a 7:27 Im 9:1-7

noposahataa bhe bhoasaono Lahata'ala ne anabii Musa endefi'ini wakutuuno nefoehe tenda kaeate'ano Lahata'ala. Lahata'ala noko-bhoasao peda aini, “Tandai'e! Bhahi-bhahi'ae itu tetewei humabue angkafi sandaha nefotiwoha ne hintu te kabhawo.”^a ⁶Tamaka ampa aitu Yesus ne'awamo taka ka'ondofaono imamu noliu'e kakalabhiano takando imamu sigao'ano, tapedamo podhandi'ano Lahata'ala bhe manusia nepoato'aono Yesus noliu'e kataano podhandi'a endefi'ini, hampano nengkoha ne dhandi sedhulu'ano kataa.

⁷Ane ibahano podhandi'a kabhao-bhaono pae nakonikaemi, tantumo pae namaraluua bhe podhandi'a bu'ou. ⁸Tamaka Lahata'ala padamo nofo'ala umatino bhe nokobhoasao,

“Kotu-kotu'u nahumato tempono, bhoasaono Ompu,
aehabu podhandi'a bu'ou bhe miendo Israel bhe
miendo Yehuda.

⁹Suano peda podhandi'a nehabuku bhe awua'indo,
wakutuuno atondada dolimba mai'ao we witeno
Mesir.

Andoa miina daeangka ne podhandi'aku na'a,
kanandoo'anomo miinamo dua aoheruandaa,
bhoasaono Ompu.

¹⁰Tamaka aini'aemo podhandi'a so nehabuku bhe
miendo Israel
we oleo mbuhumai, bhoasaono Ompu:
pahintaku atumei'e weo fekihindo,
tubhoku abuhie weo totono lalondo.
Idi somo Lahata'alando,
andoa somo umatiku.

¹¹Paemo namaraluua seemie-seemie namoina'u mie
bhaino,
paemo dua namaraluua seemie-semie namohato
bhahitieno putae,
‘Tabeano mande'aane Ompu!’
Kapa'amo kosasawindo, naobhala naohobu sanea
damande'a kanau.

¹²Sabhaha podiu modaindo a'umamponie,
sabhaha dhosando paemo ame'u-me'ulai'ea.”^b

^a 8:5 Kel 25:40

^b 8:8-12 Yer 31:31-34

¹³Hampano Lahata'ala nosambili podhandi'a bu'ou, nokoma'ana nofekangkodaumo podhandi'a kabhao-bhaono. Maka mongkodau'ano bhe molusa'ano ingka noma'omo naosali.

Boloku Mongkilo we dhunia bhe te surugaa

9:1-10

9 Podhandi'a kabhao-bhaono nandoo bhe atorano dosambahea, nonandoo dua bhe lambu kasambahea'ano we dhunia ini. ²Nandoo se'onu tenda dofoehee, maka wetano te wise dokonae Boloku Mongkilo. Ne itu nandoo bhe kaengkoha'ano kantalea, bhe nandoo dua medha kaetei'a roti kapopanga so Lahata'ala.^a ³Nandoo dua se'onu boloku we sewetano ana'a, dohondomiane dua kai bhalano; boloku aini dokonae Boloku Foliuno Kangkilo.^b ⁴Weo Boloku Foliuno Kangkilo ini nandoo medha kaetunu'a dupa dohabue mai'ao ne bulawa. Pada aitu nandoo dua sohongano podhandi'a, dodapoane sabula-bulawa. Weo sohonga aitu nandoo o nu'ua bulawa, i'ino o manna, o katukono Harun kotuna'ano bhe haa tibha kontu [kaebuhi'a koompulu pahintano] podhandi'ano Lahata'ala.^c ⁵Te wawono sohonga maitu nandoo ka'uhi kopani haa ulu, nekonando kerub, katandaino kakalabhiano Lahata'ala. Pani-ndo ka'uhi maitu nefewahai nodapohi kasongkono sohonga maitu, nekonando Kasongko Kapometaa'a. Ampamo kaowu aitu paise naembali datumula-tulae sehonda-sehonda.^d

⁶Pedamo ana'a bhahi-bhahi'ae do'atoroe, maka se'o-se'oleo imamu dopesua weo boloku te wise na'a dodhalangi taka ka'ondo-faondo.^e ⁷Tamaka membalino mesuano weo boloku we sewetano na'a [Boloku Foliuno Kangkilo] mpahinomo Imamu Bhalano, sepaku kaowu seta'u. Wakutuuno nopesua ne itu Imamu Bhalano te-tewei newowo'o bhe heano mbali kapopanga so kati'amponi'ano dhosano wutono bhe dhosando tapa nefepuundo nehabundo umati bhahino.^f ⁸Noangka ne atora aini Rohino Lahata'ala nofe-kantalea'iemo putae ane Boloku Mongkilo sadaa-daa'e, ingka

^a 9:2 Kel 26:1-30, 25:23-40

^b 9:3 Kel 26:31-33

^c 9:4 Medha kaetunu'a dupa, Kel 30:1-6. Sohongano podhandi'a, Kel 25:10-22. O manna, Kel 16:13-16, 31-36. Katukono Harun, Bil psl 17. Haa tibha kontu, Kel 25:16, Ul 10:1-5

^d 9:5 Kel 25:17-22

^e 9:6 Bil 18:2-7

^f 9:7 Im 16:1-24

kaangka'a damesua weo Boloku Foliuno Kangkilo miina'o nati-lengkaa. ⁹Aini o ka'ibahatinomo dhamani ampa aitu, ma'anano sabhaha kawa'ao bhe kapopanga nesumbele nefoampendo manusia miina namooliea nofosangka totono lalondo manusia meowano kapopanga maitu. ¹⁰Kapa'amo sabhaha kapopanga maitu nopokai kaowu bhe oti nehumaa bhe nefoho'u bhe sabhaha atorano kangkilono mbadha. Bhahi-bhahi'ae maitu sanea kaowu atorano mbadha, nofaraluu kaowu ampa tempono Lahata'ala nama-habu'ouni podhandi'a na'a.

Kristus poato'aono podhandi'a bu'ou
9:11-28

¹¹Tamaka Kristus padamo nomai peda seemie Imamu Bhalano meowano sabhaha metaa'ano toka ndumandoono. Padamo nolempagie Tenda kaeate'ano Lahata'ala, noliu'e kasangkano bhe kakalabhiano [bhe tenda we dhunia ini]. Tenda amaitu ingka suano kahabundo manusia, ma'anano miina natilentu ne dhunia nefokonandoono ini. ¹²Kristus nopesua weo Boloku Foliuno Kangkilo maitu, sepaku kaowu ampa suhue dhamani. Wakutuu ana'a Anoa miina naewowo'o heano membe mo'ane tawa heano anano sapi mbali kapopanga, tamaka heano Wutono. Pedamo ana'a ne'awamo kasalamati'antoomu ampa suhue dhamani. ¹³Heano membe bhe sapi mo'ane bhe walono anano sapi netunu dopakee mbali dokambesi'ao mie kodengo-dengono weo atorano agama Yahudi, neanomo suli dongkilo.^a Sanginomo o hea bhe walo amaitu nembalimo nefekangkilo mbadhando manusia, ¹⁴bhemo toha heano Kristus! Weo kuasano Rohino Lahata'ala dumadino suhue dhamani, Kristus nofoampe Wutono mbali kapopanga pata kodengono ne Lahata'ala. Dadi'anomo heano tetewei namekangkilo totono lalontoomu mai'ao ne sabhaha podiu meowano mate, neanomo naembali dameompuomu ne Lahata'ala dumadino.

¹⁵Kanandoo'anomo Kristus nembalimo Poato'aono podhandi'a bu'ou, neanomo mie toka nebhasino Lahata'ala dae'awa sabhaha kadawu suhue dhamani peda nedhandi'aono Lahata'ala. Bhahibhahi'ae maitu nokadhadhia hampano bhe mateno, [ingka wutono Kristus,] maka o matemo amaitu mobebasino manusia mai'ao ne sabhaha ka'ala nehabundo wakutuuno podhandi'a kabhao-bhao.

^a 9:13 Im 16:15-16; Bil psl 19

¹⁶Kapa'amo ane nandoo suhano kahunsa'ao, ingka tabeano bhe bukutiino mateno mie humabuno suha aitu. ¹⁷O suha kahunsa'ao kane'omo notiangga ane mie mebuhino suha aitu nomatemo, ane nandoo nodadi ingka miina'o natiangga. ¹⁸Dadi'anomo mahingga podhandi'a kabhao-bhaono, [pakatifokonandoono] tetewei dua dofosahaane bhe heano. ¹⁹Kabhao-bhaono anabii Musa nofosampe-mo sabhaha pahintano Lahata'ala tibuhino weo Kitabi ne kosa-sawindo miendo Israel. Pada aitu nealamo heano anano sapi bhe heano membe mo'ane, noposalokane bhe oe maka nokambesie ne Kitabino Pahintano Lahata'ala bhe ne kosasawindo miendo Israel. Kakambesino nepakeane hoono kahoku nekonando hisop bhe wuluno dhumba kadea lalo mo'ito. ²⁰Poowa nokambesida anabii Musa nopugau ambano, "Ainimo hea mekatangkano podhandi'a nehabuno Lahata'ala bhe hintimiu, tetewei dhalangie'omu."^a ²¹Pedamo dua aitu anabii Musa nokambesi hea ana'a ne tenda kaeate'ano Lahata'ala bhe sabhaha katokano sambahea.^b ²²Daanumo weo tubhono agama Yahudi naembali dakumonae bhahi-bhahi'ae dofekangkiloane hea. O dhosa pae bhe kapooli nati'amponi ane pae bhe hea lumimba'ano.^c

²³Bhahi-bhahi'ae ndumandoo'ano [weo tenda na'a], ka'ibahatino ndumandoo'ano te surugaa, tabeano dofekangkiloe peda ana'a. Tamaka bhahi-bhahi'ae kanandoo sakotu'uno te surugaa nofaraluu damekangkiloane kapopanga sedhulu'ano kataa. ²⁴Kapa'amo Kristus miina namesua weo Boloku Foliuno Kangkilo nehabundo manusia, membalino kaowu sandahano Boloku Foliuno Kangkilo sakotu'uno [te surugaa], tamaka Kristus nopesuamo te puuno surugaa, ampa aitu nofewise ne Lahata'ala so sabhaha kafaraluuntoomu. ²⁵Kristus miina naefendu-fendua'a noowa Wutono mbali kapopanga, nopo'ala bhe Imamu Bhalano, ingka seta'u-seta'u nopesua weo Boloku Foliuno Kangkilo neowa hea, tamaka suano heano wutono. ²⁶Kapa'amo ane ibahano namendua, nokoma'ana tabeano namekantuhu-ntuhu nakadee-dee mpini pakatifokonandoono dhunia. Tamaka miina nada na'a: ne pandano dhamani ini Kristus nohato ne dhunia ini sepaku kaowu noowa Wutono mbali kapopanga nesumbele so katitolosi'ano dhosa. ²⁷Padamo dofotantue,

^a 9:19-20 Kel 24:1-8

^b 9:21 Im 8:15

^c 9:22 Im 17:11

manusia tetewei damate sepaku kaowu, pada aitu daewiseki kabhotusi. ²⁸Pedamo dua ana'a Kristus sepaku kaowu noowa Wuto-no mbali kapopanga nesumbele so katitolosi'ano dhosando manusia bhahino. Anoa namendua namai, paemo naehetu dhosaa tamaka naeowa kasalamati so mie mantagino kahato'ano.

Kapopanga sumangka
10:1-18

10 Weo Kitabino anabii Musa notiwoha dandahano sabhaha metaa'ano so humatono te wise, tamaka suano'o kasalamati mpuuno. Dadi'anomo noangka ne kapopanga nefendu-fendua seta'u-seta'u, tubhono agama Yahudi pae bhe kapoolia namosangka totono lalondo mie maino sumambaheano maitu. ²Kapa'amo ane ibahano naembali, ingka tantumo dametumpumo dafoampe kapopanga. So kafetumpu'ando hampano paemo danumamisi wutondo dokodhosa mba'inomo ingka padamo dofekangkiloda sepaku ampa suhue dhamani. ³Tamaka hampano bhe kapopanga amaitu, seta'u-seta'u manusia dofe'ulaianda dhosando. ⁴Kapa'amo heano sapi bhe heano membe ingka pae bhe kapoolia naetolosi dhosa.

⁵Kanandoo'anomo wakuutuno Kristus nopesua ne dhunia ini, nopugaumo [ne Lahata'ala],

“Hintu miina moindaloe kafoampe bhe kapopanga nesumbele,
tamaka padamo mefotoka kanau mbadhaku.

⁶ Kapopanga netunu bhe kapopanga so katolosino dhosa,
miina mo'ia'anea.

⁷ Maka ambaku,
‘Aini'a kanau, o Lahata'ala!
Weo kaluluno Kitabi bhe tibuhino nopulao'ao Idi.
Kahato'aku ini so adhumalangi'ao kapoindalomu.’”^a

⁸Sa'ituini nopugau ambano, “Kapopanga nesumbele, kafoampe, kapopanga netunu, bhe kapopanga so katolosino dhosa miina moindaloea, miina dua mo'ia'anea.” Gaha'aitumo sabhaha kapopanga na'a ingka dofoampee doangkafi tubhono agama Yahudi.

⁹Pada aitu ambano toha, “Aini'a kanau, o Lahata'ala! Kahato'aku

^a 10:5-7 Mzm 40:6-8

ini so adhumalangi'ao kapoindalomu.” Dadi'anomo Lahata'ala nofosali sabhaha kapopanga ngkodau maka nololiane kapopangano Kristus.^a ¹⁰Hampanomo kapoindalono Lahata'ala nedhalangino Kristus na'a, intaodi dofekangkilo kaitaomu mai'ao ne sabhaha dhosa, noangka ne kapopangano wutono Yesus Kristus, sepaku kaowu ampa suhue dhamani.

¹¹Seemie-seemie imamuno agama Yahudi nodhalangi takano se'o-se'oleo bhe tanofendu-fenduamo nefoampe kapopanga. Tamaka kapopanga na'a pae bhe kapoolia naetolosi dhosa.^b ¹²Tamaka Imamu seemieno maitu nefoampe kapopanga sehonda kaowu mbali katolosino dhosa, nolaku ampa suhue dhamani. Palusi ana'a nengkohamo ne suanano Lahata'ala. ¹³Ampa aitu tanoanta-antagimo tempono sabhaha kaewano nahumabuda Lahata'ala so kafinda'ano. ¹⁴Kapa'amo noangka ne kapopanga sehondano maitu, mie nefekangkilo mai'ao ne dhosando nofosangkadamo ampa suhue dhamani. ¹⁵Pokai'ano bhe aini, Rohino Lahata'ala nosakusiiane dua ne intaodiomu. Kabhao-bhaono Rohino Lahata'ala nokobhoasao,

¹⁶“Aini'aemo podhandi'a so nehabuku bhe miendo Israel
we oleo mbuhumai, bhoasaono Ompu:
pahintaku atumei'e weo fekihindo,
tubhoku abuhie weo totono lalondo.”

¹⁷Pada ana'a nokobhoasaomo dua,
“Sabhaha dhosa bhe podiu modaindo paemo ame'u-
me'ulai'ea.”^c

¹⁸Dadi'anomo ane sabhaha dhosa noti'amponimo, ingka miinamo namaraluaa kapopanga so katolosino dhosa.

Kakampuu-mpuuno kaparasaea

10:19-39

¹⁹Dadi'anomo bhahitie'iku, hampano tuhuno heano Yesus intaodiomu dokadomoomu dopesua'omu weo Boloku Foliuno Kangkilo. ²⁰Yesus padamo nofomelengka'ao kaangka'a bu'ou meowanodadi. Kaangka'a amaitu nolempagi kai bhalano kahondomino Boloku Mongkilo, ingka o mbadhano wutono Yesus. ²¹Ampa aitu intaodiomu bhe Imamuntoomu Bhalano mande'aonomo Lambuno Lahata'ala [te surugaa, ²²Hampano bhahi-bhahi'ae na'a, haa

^a 10:9 Sakotu'uno: kabhao-bhaono nofogampie, so nofoehe'ao kaha onuno.

^b 10:11 Kel 29:38

^c 10:16-17 Yer 31:33-34

kaitaomu doma'otiomu Lahata'ala, weo kahelasino lalo bhe kaparasaea tumangka; wobhano handantoomu dofekangkiloemo, totono lalontoomu kumatanga-tangano nohempomo, [miinamo naekenda-kenda'ao habu modai,] mbadhantoomu nongkilomo mba'inomo padamo dokadiuane oe moinda. ²³Fintaha motangka kaitaomu ne kaposahuna'ao ne'akuintoomu, kapa'amo Lahata'ala notiparasaea, tetewei nameko'ulae dhandino. ²⁴Fodo-fodoli kaitaomu fekihi so dapofeka-fekatangka lalo, neanomo sedhulu'a dua kabhalano kanini kaasi bhe habu metaantoomu. ²⁵Koe dowoo-wulea dopohompu-hompuomu dosambahea, peda kaneando seemie hoduan mantawano itu. Intaodiomu tabeano dapotangatangahiomu, bhe nasedhulu'a kakampuu-mpuuno lalo hampano dowohaomuo oleo so kahato'ano Ompu dhulu kama'o.

²⁶Ane padamo dotahima bhe dopande'ao kabanara, tamaka dofepuu'e nandoo dua dehabu dhosa, ingka miinamo bhe kapopanga so katolosino dhosantoomu na'a. ²⁷Sehonda-hondano ndumandoono, intaodiomu deanta-antagi kabhotusino Lahata'ala timote'ino bhe efi ngkalai-laino so tumunulino sabhaha manusia mewangie. ²⁸Mie mokiidono meangkano ne tubhono agama Yahu-di, ane dosakusiiane kaowu dohodua dototolu putae nokoka'ala, lasao dopongkoe miina bhe ampoa.^a ²⁹Ane peda ana'a, nada amai bhahaa kolauno mie minda-minda'ino Anano Lahata'ala, mabhino heano podhandi'a o giu mohaku tapa kofahalaano? Gaha'aitumo hampano tuhuno heano na'a dhosano nonggelamo. Pakade nofekandidiki dua Rohino Lahata'ala fowa'aono rahamati. Ingka kahukumu so ne'awano mie medano na'a sedhulu'a kabhieno!

³⁰Ingka dopande'aaneomu la'ae kobhoasaono,

“Inodimo so bhoosiangko!

Inodimo so fohukumuno!”

Nokobhoasao dua,

“Ompu tetewei nabhitahaki umatino.”^b

³¹Ingka notimote'i mpuu ane seemie manusia nohakoe limano Lahata'ala dumadino.

³²Fe'ulai'eomu kumundo'ano. Wakutuu ana'a, pada notilakoomu tilangano Lahata'ala, nobhahi me'awaomuu kakadee-dee, tamaka sadaa-daa potaami bhe poewangiomu. ³³Siga'a dofekandidiki bhe

^a 10:28 Ul 17:6, 19:15

^b 10:30 Ul 32:35-36

dofekasabhakoomu ne wisendo mie bhahi. Siga'a dua menamisiomu kakadee-dee nenamisindo mie nefodee-dee peda ana'a. ³⁴Padamo dua menamisiomu kapeano lalondo mie netohongku. Wakutuuno arataamiu dorampasie, tatahimamoomu weo kawulano lalo, hampano pande'aaneomu bhe arataamiu lumiu'e kakesa so motahano ampa suhue dhamani. ³⁵Dadi'anomo, koise hunsao-mu kaposahuna'aomiu! Ane sadaa-daa kaposahuna'aomiu, ingka nandoo bhe ponambo bhalano so netahimamiu. ³⁶Nofaraluu kosabaha potaamiomu neanomo namada dhumalangiomu kapoindalono Lahata'ala, tetewei umawae'omu nedhandi'aono. ³⁷Kapa'amo notibuhi weo Kitabi,

“Tana sekabantaha sepali'a,
Anoa so maino ingka nahumatomo,
paemo namodhulu tempono.

³⁸Mie pometaano bhe Idi hampano kaparasaeano,
anoamo itu so me'awano dadi;
tamaka ane nandoo bhe sumowono,
pae naetaa'ane lalokua.”^a

³⁹Ampamo kaowu intaodiomu ini suano umati mesowo-sowono so binasano, tamaka intaodiomu ini umati marasaeano so me'awano dadi.

Sandahano sabhaha mie motangkano kaparasaea 11:1-40

11 Doparasaea ma'anano nokampuu-mpuu totono lalo dofi-ntahaki putae neposahuna'ao tetewei nako'ula, ma'anano dua dopande'aane mpuu giu pata tiwoha'ano kotu-kotu'u nonandoo. ²Hampano kaparasaeando, mie dhamani wawono nosambili metaada [Lahata'ala].

³Hampano kaparasaea dopande'aaneomu putae alamu bhalano ini nofokonandoo'e bhoasano Lahata'ala; dadi'anomo newohantoomu aitu nonandoo mai'ao ne pata tiwoha'ano.^b

⁴Hampano kaparasaeano, Habel nefoampe kapopanga metaa, noliu'e kapopangano Kain. Hampano kaparasaeano maitu Habel nosambili metaa'e Lahata'ala peda seemie banara, mba'inomo kapopangano maitu no'ia'ane Lahata'ala. Habel nomatemo, tamaka

^a 10:37-38 Hab 2:3-4

^b 11:3 Kej 1:1; Mzm 33:6

hampano kaparasaeano maitu, ampa aitu kao-kaomo nandoo sadhia nopugau.^a

⁵Hampano kaparasaeano, Henok notisangke sampe miina naenamisi mate. Bhe naseemie miina bhe po'awaane hampano padamo nosangkee Lahata'ala. Notibuhi weo Kitabi, miina'o natisangke, Henok seemie meka'iano lalono Lahata'ala.^b ⁶Ane pae bhe kaparasaea, manusia pae bhe kapoolia nameka'ia lalono Lahata'ala. Kapa'amo la'ae ma'otino Lahata'ala tabeano noparasaea mpuu nandoo bhe Lahata'ala, bhe noparasaea dua Lahata'ala nefontaa-ntaa ponambo so mie umondofie.

⁷Hampano kaparasaeano, Nuh nofodhagae Lahata'ala so kumadhadhia'ano te wise, tapa'o newohano. Nuh neangka ne Lahata'ala sampe nefotoka bhangka bhalano, mbalimo mosalamatie bhe kose'onu polambuno. Noangka ne kaparasaeano na'a dhunia dohukumue, tamaka wutono Nuh notahimae Lahata'ala peda seemie banara hampano kaparasaeano.^c

⁸Hampano kaparasaeano, Abraham neangka ne pahintano Lahata'ala wakutuuno nobhasie bhe notudue nakumala we wite nedhandi'aono Lahata'ala somo kahunsa'ao so siwuluno. Abraham tanokalamo mahingga miina namande'aanea nahumope ne amai.^d

⁹Hampano kaparasaeano, Abraham neate peda mie humato we koliwuno, ne wite nedhandi'aono Lahata'ala na'a. Ne itu neate weo tenda. Pedamo dua aitu Ishak bhe Yakub, sanea metahimano dhandi sehondano na'a mai'ao ne Lahata'ala.^e ¹⁰Kapa'amo Abraham neanta-antagi naeate ne se'onu kota kosandi motangkano, kota ana'a no'ide-idee bhe nofoehee wutono Lahata'ala.

¹¹Hampano kaparasaeano, Abraham ne'awa ka'osa nokosampu'a mai'ao ne Sara, mahinggamo umuhuno nakoana noliumo. Abraham noparasaea mpuu Lahata'ala tetewei namekako'ula dhandino.^f ¹²Mahinggamo wakutuu ana'a Abraham kanggetu nomatemo mbadhano, tamaka nomai'ao ne seemieno maitu, sampu'ano nobhahimo, miina natilentua, kabhahindo pedamo kulipopo te lani bhe bhone we wiwino te'i.^g

^a 11:4 Kej 4:3-10

^b 11:5 Kej 5:21-24

^c 11:7 Kej 6:11-22

^d 11:8 Kej 12:1-5

^e 11:9 Kej 35:27

^f 11:11 Kej 18:10-14, 21:1-2

^g 11:12 Kej 15:5, 22:17, 32:12

¹³Kosasawindo mie sa'ituini sanea dokokaparasaea sampe mate. Andoa miina daetahima sabhaha nedhandi'aono Lahata'ala, tamaka kao-kaomo tadowoha we kodo'o'ano o ae so ne'awando mada kaowu maka do'ia'ane. Pedamo aitu domangaku dembali mie humato bhe humampe we dhunia ini. ¹⁴Kapa'amo mie mangakuno peda na'a ingka nentaleamo notiwoha putae nando de'ondofi wite bu'ou so kapoliwu'ando sakotu'uno. ¹⁵Tantumo suanomo liwu kahunsa'ando maitu nefeki-fekihindo, kapa'amo ane nada na'a ingka nobhahimo kasalawando dasumuli we liwu ana'a. ¹⁶Tamaka ingka nentalea andoa nokamba lalondo ne liwu sedhulu'ano kataa, ma'anano o liwu te surugaa. Kanandoo'anomo Lahata'ala miina naoambanoa dokonae Lahata'alando, kapa'amo padamo nefontaa-ntaa'anda se'onu kota.

¹⁷Hampano kaparasaeano dua, Abraham nofoampe Ishak mbali kapopanga wakutuuno no'udhie Lahata'ala. Abraham notahimae-mo dhandino Lahata'ala tamaka nohelasi dua nofoampe anano kaenseemie na'a mbali kapopanga nesumbele.^a ¹⁸Lahata'ala padamo nokobhoasao ne Abraham, "Sampu'anomo Ishak ini so nekondando sampu'amu."^b ¹⁹Abraham nofekihi lalono putae Lahata'ala nokokuasa naefodadi mie mate, maka daanumo Ishak suli notahimae, kao-kaomo nomai'ao ne mate.

²⁰Hampano kaparasaeano, Ishak nobarakatimo Yakub bhe Esau bhe nosambilianda kabarakati so ne'awando te oleo mbuhumai.^c

²¹Hampano kaparasaeano, wakutuuno noma'omo namate, Yakub nobarakati ana'ino Yusuf hoduano, poowa nosambahea nofintaha ne katukono.^d

²²Hampano kaparasaeano, noma'o nahumunsa dhunia ini, Yusuf nopugau'aomo so kalimba'ando miendo Israel mai'ao we wite-no Mesir, bhe noowilianda so nehabundo ne buku'ino.^e

²³Hampano kaparasaeando, pakalentino Musa dofebunie kamungkulano tolu wula kaomponano, hampano dowoha anando nokesa sepali'a maka miina daote'ia doewangi pahintano omputo.^f

^a 11:17 Kej 22:1-14

^b 11:18 Kej 21:12

^c 11:20 Kej 27:27-29, 39-40

^d 11:21 Kej 47:31; 48:1-20

^e 11:22 Kej 50:24-25; Kel 13:19

^f 11:23 Kel 2:1-9

²⁴Hampano kaparasaeano, Musa hato nobhala nokiido daku-monae awuano omputo Firaun.^a ²⁵Anoa nopoindalo nokadee-dee poowa bhe umatino Lahata'ala, bhe nasekabantaha naetaa namisino nadumadi weo dhosa. ²⁶Weo fekihino Musa, kafeka'aebu ne'awano hampano kaparasaeano ne Mesias Omputo Fosalamatino, noliu'e kakoharagaano bhe kosasawi'ae arataano witenos Mesir, hampano nofeki-fekihi ponambo te oleo mbuhumai.^b

²⁷Hampano kaparasaeano, Musa nohunsa witenos Mesir, miina naote'ia ne amahano omputo. Musa notangka mpuu nofintahaki patudhuno, kao-kaomo nowoha Lahata'ala tapa tiwoha'ano.^c

²⁸Hampano kaparasaeano, Musa nofotudu dahumohaea'ao Paska maka nopahintangi miendo Israel daekambesi hea ne tuuhano fointondo,^d neanomo Mala'ekati Fobinasano paise namongko anando titiisa.^d

²⁹Hampano kaparasaeando, miendo Israel dopolimba ne Te'i Modea tapedamo dekala-kala te kakele'a, tamaka miendo Mesir domate notoloda oeno te'i wakutuu dofesoba doangkafida.^e

³⁰Hampano kaparasaeando miendo Israel, pada dokalibue fitu oleo kaomponano, bente bhalano kotano Yeriko nowolo nosansa.^f

³¹Hampano kaparasaeano, Rahab, seemie karambole, miina nabinasa napoowa-owa bhe mie pata meangkano ne Lahata'ala, mba'inomo notahima metaada mata-mata miendo Israel.^g

³²O ae toha bhahaa so nesambiliku? Kapa'amo pae bhe wakutuua ane atumula-tulaanda ndo Gideon,^h Barak,ⁱ Simson,^j Yefta,^k Daud,^l Samuel,^m bhe ana-anabii. ³³Hampano kaparasaeando andoa detalo liwu neowando omputo, dedhalangi ka'adhili, dotahima nedhandi'aono Lahata'ala, de'opi wobhano singa, ³⁴depeoni hendeno efi mobhibhiisa. Andoa dolapa ne matano kampue,

^a 11:24 Sakotu'uno: *anano ana hobhineno Firaun.*

^b 11:24-26 Kel 2:10-12

^c 11:27 Kel 2:15

^d 11:28 Kel 12:21-30

^e 11:29 Kel 14:21-31

^f 11:30 Yos 6:1-21

^g 11:31 Yos 2:1-21, 6:22-25

^h 11:32 Hak psl 6-8

ⁱ 11:32 Hak psl 4-5

^j 11:32 Hak psl 13-16

^k 11:32 Hak 10:6 - 12:7

^l 11:32 1Sam psl 16 - 1Raj psl 2

^m 11:32 1 Sam psl 1-25

kanalendo nembali ka'osando, andoa do'osa weo popahisa'a sampe dotalo tagu-taguando tantarando koliwuno. ³⁵O hobhine'i suli do'awa mie nemoasi'aondo toka mateno, hampano suli dodadi. Nandoo dua nesikisaa ampa domate, dokiido damobebasida hampano gaondo suli dadumadi ne dadi sedhulu'ano kataa. ³⁶Nandoo dua doele-eleda, dohambisianda habuta, dokatapuanda hante maka dofopesuada weo katohongku. ³⁷Andoa dobhatumbulianda kontu ampa domate, siga'a dopokebhaanda kahakadhi bhe dopongkoanda kampue. Andoa dolili tadepakemo kulino dhumba tawa kulino membe mbali pakeando, doka, dofodee-deeda bhe dosikisaada. ³⁸Dhunia ini miinamo namantasia so kaeate'ando. Andoa tadolilimo weo pandaso bhalano bhe te tombuno kabhawo, tadeatemo weo lia bhe ne losono kontu.

³⁹Kosasawindo ini nosambili metaada Lahata'ala hampano kaparasaendo, gaha'aitumo miina'o datumahima nedhandi'aono Lahata'ala. ⁴⁰Kapa'amo Lahata'ala nandoo bhe patudhuno sedhulu'ano dua kataa so intaodiomu. Patudhuno Lahata'ala andoa maitu kane'o dae'awa kasangkano dadi dapoowa-owa bhe intaodiomu.

**O kasabha mbali dhalano katangahi
bhe kahukumuno Ompu
12:1-17**

12 Intaodiomu ini dofowaliligi sakusii bhahino na'a, tapedamo o olu dofokaputi. Dadi'anomo [kanggetu meangkafino pogolo-golo'a] hunsa kaitae'omu toha sabhaha fofekabhieno bhe fo'onto-ontomino bhe dhosa mansopikano. Tende kaitaomu kansuhu, potaami kaitaomu weo pogolo-golo'a newisekintoomu ini. ²Poowa bhe tendentoomu, ondo kaitaomu kansuhu te wise, te Yesus. Anoamo melengka kaita kaangka'ano kaparasaesa, Anoamo dua so mosangkano kaparasaesantoomu. Yesus netaami kakadee-dee te sau salipu bhe miina naoheruane putae domate te sau salipu maitu giu timoambano'aono, hampano sehonda-honda nefe'ulaino: te wiseno nandoo kawulano lalo bhalano so netahimano. Ampa aitu Anoa nengkohamo ne suanano kaengkoha'ano kumalabhiano Lahata'ala. ³Sadhia fe'ulai'omu Yesus potaamino kakadee-dee nopowise bhe mie kodhosa mewangie, keana nondidiki lalomiu maka nobhotu posahuna'aomiu. ⁴Kapa'amo weo poewangi'amiu bhe dhosa, ingka miina'o namotuhua heamiua.

⁵Molimpu'aanemoomu gaha'a katangahino Lahata'ala kumona-koomu ana'ino? Ingka bhoasaono peda aini,

“Anaku! Koe pisakiomu katangahi bhe kahukumuno
Ompu,
koise nobhotu kaposahuna'aomiu ane
nofo'alakoomu.

⁶ Kapa'amo Ompu notangahi bhe nohukumu mie
nemoasi'aono,
kotika nekonano ana'ino nopepekida.”^a

⁷Potaamiomu weo kasabhamiu, tahimae'omu peda katangahi bhe kahukumuno Amamiu, kapa'amo Lahata'ala ingka nokonakoomu ana'ino. Bhahaa nandoo seemie ana'i tapa sepali'a netangahi bhe nehukumuno amanoa? ⁸Ane hintimiu paise me'awaomu katangahi bhe kahukumu nada kosasawindo ana'ino sigao'ano, nokoma'ana hintimiu itu suano ana'i mpuu tamaka ana'i pata sumaha. ⁹Kosasawintoomu bhe amantoomu we dhunia ini maka andoa dotangahi bhe dohukumumu kaita, katifosibhala'andomo. Sanginomo amantoomu we dhunia ini pedamo ana'a, bhemo toha Amantoomu te surugaa, ingka teteweimo nasedhulu'a dua damotuhu wutoontoomu ne Anoa so dadumadi'ao. ¹⁰Kamungkulanto we dhunia ini dofotangahi bhe dofohukumumu sebantaha kaowu, tadoangkafimo metaa'ano weo fekihindo. Tamaka Lahata'ala nofotangahi bhe nofohukumumu so kaetaa'antoomu, neanomo daongkiloomu nada Anoa. ¹¹Daanumo sabhaha katangahi bhe kahukumumu, wakutuuno dofondawue miina naeowa ka'ia tamaka neowa kaguguhu. Ampamo kaowu pada ana'a, so mie metandaino kafoina'u, kahukumumu amaitu nokohasili'ao kabanara bhe katohopono dadi.

¹²Dadi'anomo fekatangkae limamu monaleno, fekalaa tuumu mehengku-hengkuno itu. ¹³Fekalaa'e kaangka'ano a'emu, neanomo a'emu mokempano itu paise natokulepea.

¹⁴Ulei'e lalomiu dadi pometaa bhe kosasawindo mie bhaimiu, ulei'e dua lalomiu dumadi mongkilo so Ompu, kapa'amo miina bhe manusia so mohano Ompu ane pae nadumadi mongkilo. ¹⁵Dhaganie'omu koise bhe mekapingkano mai'ao ne rahamatino Lahata'ala, koise dua bhe so membalino peda kantisa mopa'i kohasu ne olotamiu itu, kapa'amo hasuno naeowa kasabha bhe naedai-dai mie bhahi. ¹⁶Dhaganie'omu koe sampe bhe dumadi pokawite-witeno tawa tapa mefadhulino dadi lumebe peda Esau. Ingka anoa

^a 12:5-6 Ams 3:11-12

noaso hakuno titiisa so kaowu ne'awa'ao oti sepihi.^a ¹⁷Ingka pande'aaneomu, pada ana'a Esau gaono sumuli natumahima kabarakatino tamaka [amano] miina na'umundaa. Kapa'amo mahingga nopotuhu bhe luuno ne'ondofi kasalawa namekataa'i ka'alano maitu, miinamo bhe dhalanoa.^b

Po'alano podhandi'a bu'ou bhe podhandi'a ngkodau
12:18-29

¹⁸Hintimiu miina [peda miendo Israel endefi'ini. Andoa] do-
ma'oti tikadampa'ano, [o kabhawono Sinai] bhe efino ngkalai-
laino, dewiseki kahohondo bhe doloma mposo bhe kawea mongkolo. ¹⁹Andoa dofetingke peda ndiino duhulele bhalano bhe
suaha mobhibhiisano. Wakutuuno dofetingke suaha aitu miendo
Israel lasao desalo paemo namendua namugau ne andoa. ²⁰Ka-
pa'amo miina damondoi'e dofetingke pahinta nefosampeno suaha
ana'a. Ambano, "Kotika dumingkuno kabhawo aini, mahingga o
kadadi, tetewei dabhatumbuliane kontu ampa namate." ²¹Ne-
wohando miendo Israel maitu nobhibhiisa bhe notimote'i sepali'a
sampe anabii Musa nopugau ambano, "Nogugu kanau ka'osano
kate'iku!"^c

²²Tamaka nopo'ala bhe hintimiu. Hintimiu hatoomu ne ka-
bhawono Sion, ne kotano Lahata'ala dumadino, kotano Yerusa-
lem te surugaa, ne kantawundo mala'ekati ntini hewu-hewuno.
²³Hintimiu mai meangkafiomu hompu'a mohame, hompu'ando
umati sanea ana'i titiisano Lahata'ala, toka tibuhino nea te surugaa.
Hintimiu mai fewiseomu ne Lahata'ala, bhitahakino kosasawindo
manusia. Hintimiu powiseomu bhe rohindo mie banara toka mo-
sangkanu dadi. ²⁴Hintimiu mai fewiseomu ne Yesus, Poato'aono
podhandi'a bu'ou; heano podhandi'a bu'ou ini [neowa kati'ampo-
ni'ano dhosa], noliu'e fahalaano bhe tuhuno heano Habel [meso-
nsono kabhoosi].^d

²⁵Dadi'anomo posi'ondoomu, koe sampe mokiido metingkeomu
kobhoasaono itu. Ane mie tapa metingkeno meowano bhihitano

^a 12:16 Kej 25:27-34

^b 12:17 Kej 27:1-41

^c 12:18-21 Kel 19:1-22; Ul 4:11-12, 5:22-27, 9:19

^d 12:24 Sakotu'uno: *hintimiu mai'omu ne kakambesino hea, pugauno hea ana'a noliu'e kataano bhe pugauno heano Habel. Habel, ondo Kej 4:10*

Lahata'ala ne dhunia, miina damooli dalumapaa ne kahukumu, bhemo toha intaodiomu metingkeno kobhoasaono mai'aono te surugaa. Ane dokiido dametingkee'omu, ingka tetewei paise dalumapaomu ne kahukumu.^a ²⁶Endefi'ini suahano nofogugu dhunia, tamaka ampa aitu nopodhandi, “Tana sepaku amogugue, suano kaowu ta'o dhunia tamaka bhe lani dua.”^b ²⁷Wamba “tana sepaku” maitu ingka nokoma'ana putae sabhaha nefokonandoo tifoguguno damosalie, neanomo tapa tifoguguno somo meate'ano.

²⁸Kanandoo'anomo naetaa daefoampe katumpuno lalo ne Lahata'ala, hampano detahimaomu kafopahinta'a tapa tifoguguno. Naetaa natumumpu lalontoomu bhe dasumombaomu weo kamihi bhe kafosibhala ne Lahata'ala, naposahataa bhe kapoindalono Wutono. ²⁹Kapa'amo Lahata'alantoomu tapedamo hendeno efi fohampunino.^c

Katangahi kapuliaono

13:1-19

13 Naetaa sadhia pomoni-monini'ao'omu peda mie pobhahi-bhahitieno! ²Sadhia mohelasi mefotiampeomu mie tapa'ao nepande'ao weo lambumiu, hampano nandoomo mefotiampeno mala'ekati, tamaka miina damande'aanea. ³Fe'ulaidaomu mie weo katohongku kao-kaomo hintimiu itu titohongkuomu dua bhe andoa. Fe'ulaidaomu mie nefompina-mpina kao-kaomo hintimiu dohabukoomu dua peda ana'a.

⁴Kosasawi'amiu fosibhalae'omu o kakawi, koise pokadengo'ao kaodo'amiu, kapa'amo mie pokawite-witeno bhe monsuleno nabhitahakida Lahata'ala. ⁵Koise membaliomu bhatuano dhoi, ne taamo notumpu lalomiu ne kanandoomiu. Kapa'amo Lahata'ala padamo nokobhoasao, “Paise sepali'a akumatahokoa, paise sepali'a ahumunsakoa.”^d ⁶Dadi'anomo dokado dopugau'omu,

“Ompu tumulumi kanau, paise aote'ia.

Damafa'i kanau gaha'a manusia?”^e

^a 12:25 Kel 20:22

^b 12:26 Hag 2:6

^c 12:29 Ul 4:24

^d 13:5 Ul 31:6; Yos 1:5

^e 13:6 Mzm 118:6

⁷Fe'ulaidaomu neangkamiu toka mefosampeangkoomu bhoasano Lahata'ala. Ondoomu kodadindo bhe komatendo, maka mesandahaomu ne kaparasaendo. ⁸Yesus Kristus sadaa-daa'e nopo-toto, endewi, oleo itu bhe ampa suhue dhamani.

⁹Koise namekakolilinkoomu sabhaha kafoina'u sumempa mengkahatono. Naetaa totono lalontoomu namekamatangkae rahamatino Lahata'ala, koise namekamatangkae sabhaha atorano oti nehumaa. Mie meangkafino sabhaha atorano oti nehumaa na'a miina dae'awaa fahalaanoa. ¹⁰Nandoo bhe medha kaefoampe'antoomu kapopanga, tamaka [imamundo Yahudi] mepopangano weo tenda kaate'ano Lahata'ala miina naembalia dohumaa oti ne medha ana'a.^a ¹¹Heano kadadi nefoampe nowowo'oe Imamu Bhalano ne Boloku Foliuno Kangkilo mbali kapopanga so katolosino dhosa, tamaka uluno kadadi ana'a dohampue we sembalino kapoliwu'ando.^b ¹²Kanandoo'anomo dua, Yesus nomate we simbalino kagualino kota, mbali nofekangkilo'ao umatino noangka ne tuhu-no heano Wutono.

¹³Dadi'anomo mai dokalaomu se Anoa we sembalino kapoliwu'a, daeala dawu weo kafeka'aebu nenamisino. ¹⁴Kapa'amo we dhunia ini miina bhe liwu kaate'antoomu suhue dhamani, ne'ondofintoomu o kota we oleo mbuhumai [so kapoliwu'antoomu suhue dhamani].

¹⁵Dadi'anomo sadhia foampe kaitaomu kapudhi ne Lahata'ala namangka ne Kristus, ana'aemo kapopanga nefoampentoomu, noangka ne wiwinto mekakalabhiano neano. ¹⁶Koise molimpuumu habu metaa'omu bhe fotulumiomu, kapa'amo ana'aemo kapopanga meka'iano lalono Lahata'ala. ¹⁷Meangkaomu ne meangkamiu bhe tuhuomu ne andoa, kapa'amo andoa dhumaganino alusumi maka dapowise'ao takando na'a ne Lahata'ala. Meangkaomu, neanomo dakumahadhaa weo kawulano lalo, keana bhe fedeea, hampano fedeedo pae nakofahalaa so hintimiu. ¹⁸Sambahea kainsamiomu. Tapande'aanemo mpuu totono lalo mani kumata-tangano nongkilo, hampano kapoindalo mani ne ae maka dua sadhia tadumadi metaa. ¹⁹Puuno kamesaloku sambahea'omu, neanomo naehimba damosuli kanau we hintimiu.

^a 13:10 O medha kapopanga ne aeati ini suano altar we garedha, tamaka sau salipu katikantai'ano Kristus, kamai'ao'ano dadindo mie marasaeano.

^b 13:11 Im 16:27

Kasongkono suha
13:20-25

²⁰Ingka Lahata'ala padamo nofowanu Ompu Yesus mai'ao ne mate. Hampano tuhuno heano, Anoa nembalimo Dhagano Dhumba Kumalabhiano so intaodiomu, mekatangkanomo dua podhandi'a suhue dhamani nehabuno Lahata'ala bhe intaodiomu.

²¹Sio-siomo Lahata'ala kamai'ao'ano katohopono dadi, namosa-angkaangkoomu sabhaha metaa'ano so dhumalangi'ao'omu ka-poindalono. Sio-siomo dua weo dadintoomu Lahata'ala naehabu podiu meka'iano lalono, namangka ne Yesus Kristus. Notifekakalabhia Kristus ampa suhue dhamani. Amin.

²²Bhahitie'iku, aesalo mpuu sabhahakie'omu sabhaha wambano katangahi ini, kapa'amo suha nebhuku ini ingka miina naewantaa. ²³Naetaa mande'aaneomu bhahitientoomu Timotius dofolimbaemo mai'ao we katohongku. Ane napikihato se ini, awowo'oe amai we hintimiu itu.

²⁴Fosampe kanau'omu salam ne kosasawindo neangkamiu bhe kosasawindo umati marasaeano. Bhahitie'i mai'aono we Italia depakatuangkoomu dua salam.

²⁵Sio-siomo kosasawimiu itu sadhia napobhaiangkoomu karakatino Lahata'ala.